

Date – 11/02/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizorama ran vulhtute tan AH & Vety Minister Pu C Lalsawivunga chuan Animal Insurance a tlangzarh.
2. Mizoram sawrkarin Mizoram State Healthcare Scheme changtlung zawk kalpui turin Asian Development Bank atanga loan assistance hmuhna tur a tifel.
3. Election Commission chuan Special Revision 2026 neih anih hnua Assama Assembly bial 126-a final voter list a tih chhuahah vote nei 2,49,58,139 a awm.
4. Rajya Sabha leh Lok Sabha-ah Union Budget sawiho chhunzawm a ni a, Lok Sabha Speaker Om Birla chu alak no confidence motion tihfel anih hma chu house thutkhawm ah a tel dawn lo.

<><><>

ANIMAL INSURANCE

Mizorama ran vulhtute tan AH & Vety Minister Pu C Lalsawivunga chuan Animal Insurance a tlangzarh a. Hemi atan hian National Insurance Company Ltd. leh AH&Vety Department Secretary Pu Lalsangliana ten Minister leh MSPCC Vice Chairman Dr. KC Lalmalsawmzauva hmaah thawhhona thuthlung an ziak a ni.

He Animal Insurance hian vawk, bawng, sial, kel, beram leh vanvulh dangte a huap dawn a. Premium zaa sawmpanga hi ranvulhtu ten an tum ve tur a ni a, Handholding hnuaia progress partner te erawh chu handholding atanga tumsak vek an ni dawn thung a. Vawk vulh insurance atan cheng 2000 chawi tur kha cheng 292 chauh vawk vulhtuten ten an tum a ngai dawn a ni.

Minister Pu C. Lalsawivunga chuan ranvulhtute mamawh em em ran insurance kalpui tak tak tura hmalakna a awm ta chu lawmawm a tih thu a sawi a. Insurance Company tam zawkin animal insurance an tuipui loh thu leh, ASF avanga Mizoramah insurance company kohluh an har thu sawiin, Chief Minister Pu Lalduhoma'n Sorkar laipuih thlen in, Insurance Company hrang hrang Head Office ah lehkha a thawn avanga tun dinhmun thleng ta an nih thu a sawi bawk.

Minister chuan sorkarin animal insurance ah theihtawp a chhuah thu sawi zuiin, Animal Insurance-a State Matching Share zaa 30 pawh zaa 10 a tihhniansak turin Union Minister ah a ngen thu leh Mizoram ngenna angin zaa 10 ah tihhniansak a nih thu a sawi a. Tuna insurance tlangzarh tak atan hian Central atangin cheng nuai 66 sing 4 sang 9 hmuh a nih thu leh, hei hi first installment chauh niin, first instalment ah hian ran 4545 insured tum anih thu a sawi a ni.

<><><>

MUCHS

Mizoram sawrkarin Mizoram State Healthcare Scheme changlung zawk kalpui turin Asian Development Bank atanga loan assistance hmuh tuma rei tak hma a lo lak tawh chu tih puitlin niin Loan agreement sign fel a ni.

ADB loan lakna tur hi kumin January ni 23 khan ADB Headquarters, Manila-ah sign a ni a, India aiawhin Baldeo Purusartha, Joint Secretary, Department of Economic Affairs, Ministry of Finance chuan a sign a, ADB aiawhin Mio Oka, Country Director, Director, India Resident Mission chuan signin, Mizoram sawrkar aiawhin Pu Ramchuana, Finance Secretary chuan a hmuna kal loin e-mode in a sign ve bawk a ni.

Hemi atan a Mizoram sawrkarin loan project a siam “Improvement of Mizoram State Health Care Scheme by enhancing the Corpus Fund” tih hi kum 2022 May ni 31 khan Ministry of Finance chuan a lo pawm tawh na a, harsatna hrang hrang avangin approve theih lohina awm a, tun sawrkar hian thar thawh lehin “Supporting Public Healthcare System Strengthening to Achieve Universal Health care for Mizoram” tiha thlak a ni.

Mizoram Universal Healthcare atana ADB atanga loan hmuh zat hi USD 108 million niin, India pawisa chuan cheng vbc 800 vel a ni a. ADB loan pumpui hi Ministry of Finance hnuaiia Externally Aided Projects hnuaiia hmuh a nih avangin sorkar laipui a rulh tur a ni.

Central sawrkar hian loan pumpui atanga zaa 90 chu grant angin Mizoram a pe ang a, zaa 10- cheng vbc 80 chui Mizoram sawrkar hnenah loan anga Mizoramin a rulh ve turin a puktir chhawng dawn a. Mizoram sawrkarin he zaa 10 a rulh ve tur chin a rulhna tur interest rate hi chu Central sawrkara Ministry of Finance in a la ruahman tur a ni.

Mizoram sorkar chuan thawhtanni khan MUHCS kalpuitu damdawi-inte hnenah damlo enkawlina senso rulh nan cheng vbc 9 leh nuai 99 a pe a; sorkar kum kal mekah MUHCS kaltlangin MUHCS zawmtu damdawi-inte hnenah damlo 83,680 enkawlina senso rulh nan cheng vbc 126 leh nuai 39 a pe tawh.

Mizoram State Healthcare Society (MSHCS)-in a tarlan danin, sorkar kum kal mekah nikum April thla atanga nimin January ni 9 thleng khan Mizoram sorkar chuan MUHCS zawmtu damdawi-in hrang hrang hnenah damlo enkawlina senso rulh nan tum 58 pawisa a pe tawh a, pawisa a pek chhuah tawh zawng zawng hi cheng vbc 126.39 niin, damlo 83,680-te enkawlina senso a ni.

<><><>

MHIP GEN. HQTRS

MHIP General Headquarters chuan nimin khan Aizawl khawpui veng hrang hranga vaihlo atanga siam zuk leh hmuam (gutkha product) zawrhna dawr hrang hrangah gutkha product-te zuar tawh lo tura ngenna lehkha an sem.

MHIP General Headquarters president Lalliani chuan, gutkha product zawrhna dawr neitute leh agente chu Mizo thalaiten gutkha product an

chhiatpui nasat avangin Mizorama lalut tawh lo tura an ngen dawn thu sawiin, gutkha product hi drugs kailawn a nih thu a sawi.

MHIP General Headquarters chuan dawr hrang hranga ngenna lehkha an semah hian Mizo mipuite chu gutkha product hmanga rùn mek an nih thu an tarlang a; gutkha product-te hian nasa takin hriselna a tichhia a, ruihhlo hlauhawm zawk tih chhohna kawng a nih thu te, MHIP chuan Mizorama gutkha product lakluh leh zawrh an do flat thute an tarlang.

Gutkha product agent dawr lian zawng zawngte chu Mizorama la lut tawhlo turin MHIP chuan an ngen a; dawr tê zawng zawng, vengtin leh khawtina mite pawh zuar tawh lo turin an ngen nghal bawk a ni.

<><><>

CHAMPHAI FIRE PREVENTION

Nungchate chenna leh Tui thianghlim min petu ramngaw, kangmei lakah venghim rawh tih thupuia hmangin nimin khan Champhai Zotlang DIET Auditorium ah Fire Prevention Week, 2026 hawna buatsaih a ni a.

Hawna inkhawm, Champhai District Honorary Wildlife Warden Pi Lalrammawii, kaihhruaiah hian Addl DC Pu James Lalnithanga chuan thu sawiin mei hi a tangkai zawnga hman chuan thian a ni thei a, mihring hmelma a ni thei bawk a, kangmei vanga chhiatna a thlen loh nan, inven hi tihdam aiin a tha zawk tih hriain kangmei tichhuak lo turin tan la theuh turin kalkhawm mipuite a sawm.

Champhai DFO leh District Level Fire Prevention Committee Secretary ni bawk Pu Lalnunchama Chawngthu chuan kum 15 kalta chhunga Mizoram leh Champhai District a kangmei chhuah thin dan leh ramngaw kan neih dan dinhmun tlangpui a report a. Tun dinhmunah Mizoramin ramngaw chhah tha zaah 1.24 chauh a awm tawh a ni a ti.

<><><>

AGRI

Agriculture Dept Director thar Pu Vanlalthlamuana'n Serchhip Mat phai Zawlpui nimin khan a tlawh a,

Zawlpui chu leilet leh ram neitu ngeiin a hlawkna zawng zawng an têt a. Hmun dangah erawh chuan leilet leh thlai atanga a hlawkna chu a siamtu hmun danga miten an tel nasa a ni a ti a. FMC ten hmalakna tura an mamawh thil 6 an lo thlen te chu a vaiin tihhlawhtlin theih loh mah se, a pawimawh zual chu bawhzui tum a ni ang a ti a. Zawlpui thlai chu Mizoram thlaia chawmtu a nih avangin a pawimawh hle bawk a ni a ti a. Agri Deptt chuan lian zawka hmalak a nih theih nan sorkar laipui project leh scheme lian zawk te nen tan ho dan zawn a ni a. Leilet ah hian buh leh thlai bakah Sangha thlenga thar chhuak tura hma lak dan kawng dap a ni ang a ti bawk.

He hunah hian Dy Director Pu K.Laltnanmawia'n tun sorkar a tual chhuak buh thar lei khawm a suma chantir chu kuthnathawktute tan thil tha tak nia hriat thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MSPMC

Mizoram State Project Monitoring Committee (MSPMC) te chuan nimin khan Saitual District-a Circuit House, DC Bangla leh District Hospital sak mek an endik.

He hunah hian MSPMC team te chuan building sak lai te chu an hnathawh chin te an endik a, a thawktute chu kawmin an harsatna tawh te an zawt a, test tur te ti a, bungraw chah ngai te pawh a rang lama chah turin an hrilh nghal a ni.

Nimin vek khan MSPMC te hian Khawzawl District a project hnathawh mekte a hmunah endik a. District Hospital leh Circuit House sak mek te an tlawh

Project kal dan te, mamawh an neih te, harsatna an tawh te sawi ho a ni a, project tluang takin a kal chu lawmawm an tih thute an sawi a ni.

He hunah hian MSPMC member Arch. George Lalzuia, leh a thawhpuite an kal a ni

<><><>

PARLIAMENT

Rajya Sabha leh Lok Sabha-ah Union Budget sawiho chhonzawm a ni a, Lok Sabha Speaker Om Birla chu alak no confidence motion tihfel anih hma chu house thutkhawm ah a tel dawn lo. Nimina Rajya Sabha inkhawmah Shiv Sena MP Milind Deora chuan politics leh eibar dinhmuna hun harsa tak a thlen mek karah India chuan eizawna kawngah thangin eibar dinhmun a sawhnghet a ti a. BJP MP Surendra Singh Nagar chuan Budget in sum dinhmun tihmasawn zel a ngai pawimawh a, mipuite beiseina tihhlawhtlin leh social sector scheme hrang hrangten a dawngtu tur mipuite kut a thlen a ngai pawimawh hle a ti bawk.

DMK MP Kanimozhi chuan budget chu mirethei hlamchhiahtu budget anih thu sawiin a taka eibar dinhmunah a tak tak a khawih phak lo a ti bawk. TMC MP Sukhendu Sekhar Ray chuan budget in rampawn atanga sumdawngte tan FDI zaa za a phal tih sawiin hei hian ramchhunga insurance company te dinhmun a ti derthawng a ni a ti bawk.

Lok Sabha ah pawh Budget hi sawiho a ni a, BJP MP Aparajita Sarangi chuan budget chuan sawrkar inpekna, nghehna leh tumruh zia a hmuh theih a ti a. Ram hrang hrang te nen Free Trade agreement an ziak thei chuan khawvel dinhmun inher danglam nasa tak karah India chuan a kawng a sial hneh hle a ni tih a tarlang a ti bawk.

Hetihlai hian Lok Sabha Speaker Om Birla chuan a laka no confidence Motion tihfel anih hma chu house rorela tel a tum lo tih a sawi a.

Puan tawh angina Lok Sabha-a Opposition Member te chuan Speaker Om Birla rin tawh lohna motion hi an thehlut a. Thudawn danin Opposition memberte hian Lok Sabha Secretary General hnenah lehkha an thehlut a. Dan angin he lehkha hi zir chian anih hnuah hmalak chhonzawm a ni ang. He motion thehluhah hian Opposition party zingah Congress, DMK, Samajwadi Party, RJD leh Left Party ten an thlawp thu an ziak a. Hetihlai hian Opposition zingah TMC in an ziak ve lo thung a ni.

<><><>

ASSAM

Election Commission chuan Special Revision 2026 neih anih hnuah Assama Assembly bial 126-a final voter list a ti chuak a. He final list ah vote nei 2,49,58,139 an awm a. Assam Chief Electoral Officer (CEO) sawi danin draft list atangin hming 2,43,485 paih a ni a. November ni 22 atanga December ni 20 2025 chhung khan intina kalin voter finfiah an ni a. Voter list atanga paihte hian ni 15 chhungin District Magistrate te hnenah ennawn dilna an thlen thei a, hemi hnu hian ni 30 chhung CEO hnenah an thlen leh thei bawka a ni.l

<><><>